

SAN PEDRO CARTA E'SU FI'JNI

Dyus yacj fi'nzesaty Pedro fi'jni

1 ¹Jesucristo's selpisáa Simon Pedro yaasetj, tyajy jycaajnisá. Tyāasa naa carta's fi'jatstju, i'cue'shva cue'sh na'wēyrráa i'cue Dyusa's yaacywa'ja's ji'pju naa pa'ga. Tyā'wē yuucajnii cue'shtyi nwe'wesa Jesucristo nwe'wec. ²Dyusa's jiyui'cue sa' cue'shtyi jype'jsa Jesusa'sva jiyupa'ga, wala ew mfi'nzewe.

Dyus ma'wēsate' tyāa na'wēysa yuuna pa'jya' na'wēsaty mpaacuewe

³Tyāa pa'gatey cue'shtyi pa'yasa's jiyupa'ga tyā' jyuca ūscu cue'sh quij peejini'sva, sa' quij pcal yujva ji'pjmée fi'nzewa'ja'sva tyā'wēy. ⁴Tyā'wē Dyusa' quijte yujva shiingmée pu'chwa'ja's ji'pjrra írráac cue'shtyi's nwe'weya' puuty we'we. Tyā'wē yūute', i'cue'sha' naa quiwete jyuca ewmeesa canzh yajcyna fi'nzenijū tyuteerra, tyāa ma'wēsate' tyāa na'wēysa írráa yuuna pa'cjancu tyā'wē yūu. ⁵Tyāa pa'ga Dyusa' pu'chjina sūjwa'ja's ji'pjrra', jweeírráa ew fi'nzewa'ja's mji'pjuwe. Sa' ew fi'nzewa'ja's ji'pjrra', Dyusa's jweeírráa ew jiyuwa'ja's mpaacuewe. ⁶Dyusa's ew jiyuwa'ja's ji'pjrra', peecy cacue ewmée yūuya' yaacyni's nwēese'jmée fi'nzewa'ja's mji'pjuwe. Peecy cacue's nwēese'jmée fi'nzewa'ja's ji'pjrra', űuswa'j pa'tjeva chjāchja fi'nzewa'ja's mpaacuewe. Sa' tyā'wēsana ji'pjrra', Dyusa'srráa neewe'wena fi'nzewa'ja's mpaacuewe. ⁷Dyusa'srráa neewe'wena fi'nzewa'ja's ji'pjrra', yacjtjē'jwe'sh yacj ewrráa wēt fi'nzewa'ja's mpaacuewe. Tyā'wēsa's ji'pjrra', peeygāawa'ja's mji'pjuwe.

⁸Tyā'wēsaty i'cue'sha' jypa'garra jyuca nwēese'jrra', cue'shtyi jype'jsa Jesucristo's cyulterráa jiyurra en iviit-sa yuumeene'cue. ⁹Nava maava tyā'wēsaty ji'pjmee'sa uyya' ājasamée na'wēsa yuuna, sa' Dyusa' pcaltyi's peltunāyteva pechcanasa yuuna. ¹⁰Tyāa pa'ga Dyusa' i'cue'shtyi tyjityjrra pa'yayā'tje', tyā'wēsaty i'cue'sh ūuste bagachteva ji'pjuwa'jrrá's mpa'pchuwe. Tyā'wē yūurra' bagachte yujva Dyus tashu tyutemeene'cue.

11 Tyā'wē yūusatyi' tjēymée ūsni yuuna Jesucristo cue'shtyi nwe'wesa tashte u'cawa'ja's. Cyteea' bagachte yujva ptsuwa'jsame'.

12 I'cue'sha' tyā'wē yūuwa'ja's ew jiiira āchj naa ensu isa pta'shniñū tyutemée ūsne'cue, nava andya' tyā'wē yūuwa'ja's caayaquij'na nes yu'nja. 13 Andy uumeyrráava i'cue'shtyi' yu'cypejna nes yuuni ewna sūju'tj pechcanawe'shte. 14 Tyā'wēme', tyachmeyna andy uuwa'ja's caajiyu'cj cue'shtyi jype'jsa Jesucristo'. 15 Tyāa pa'ga nee uumey tyā'wē yūuwa'ja's yu'cypejna nes yu'nja, cyaj andy uuteva i'cue'sh ūuste neeyūute', pechcanamée cytey yuuna nes yuune'cue.

Jesucristo tyacue seena' walasa's uysáa

16 Cue'shtyi jype'jsa Jesucristo quijteva jyuca ājasa shawendna quiiwa'ja's pta'shtja'w tyā' ūus yajcyrra išhiinisameec yu'. Tyāa pa'gategy cue'sh yafyju yuu uytja'w tyacue seena' zhichcue walasa yuurra vyaate. 17 Tyā'wē Dyus cue'sh Tata' Jesucristo's wechana zhichcue eena' cweetjni'stja'w uy, sa' Dyusa' na'wēc we'we: Na' andy Nchi'c wendynisa', tyāa pa'ga wala wechana ūstju jī'c. 18 Cielujū tyā'jina we'weni's cue'sh yuutja'w wēse'j, tjā'j vitste Dyus vyaac cyte cue'shtyi jype'jsa Jesucristo yacj ūsrra'.

19 Tyā'wērráamée, vite ji'ptja'w tyāac wejy āate pta'shi'. Tyā' e'su Dyus ma'wē yūuwa'ja'sva dyiicjēy pta'shna fi'jrra nviitnisa'. Tyāa pta'shnisa's i'cue'sha' nwēese'jrra', ew yūsáa yuune'cue. Tyāaí cus chji'ndyteva eena' cweetjsa', cjicjiitste estrella na'wēsa i'cue'sh ūuste pqui'tapcach. 20 Nava i'cue'sha' ew mjiyuwe: Dyus yuwe dyiicjēy pta'shna fi'jrra nviitnisa' maa yujva peecy ūusujrráa yajcyrra fi'jnisa yuumeeta'. 21 Tyāa pa'gategy Dyus quij yūuya'vateva dyiicjēy pta'shsawe'sha' Dyus yacj fi'nzesaty yu', sa' peecy ūusujrráa yajcyrra we'wemée, Dyus Espiritu cwe'we'tjety tyā'wē fi'jna ūsu'.

Dyus yuwe's išhiina pta'shsa

2 1 Tyā'wēteva, išhiisava ūsu'ty Dyus yuwe pta'shsatja'w jīsa Israelwe'sh cshavysu, sa' i'cue'sh cshavysuva tyā'wēy išhiisa casejetyna. Tyāawe'sha' caypumba'jwa'jrrá's yajcyrra i'cue'sh jiyunimeete caapiya'jatyna. Tyā'wē yūuna nwe'wesa Cristo's yuu atsesa yuutyna. Nava tyā'wē yūusa' peequírráa wala dund vituwal'j ji'pjutyna. 2 Tyā'wē yūute', maanzcuēsava tyāawe'sh ewmeesa's caapiya'jnirrá's cytey yuuna fi'nzetyna, atsa' tyāawe'sh pa'garráa Dyus yuwe isasa yu' atsewe'weni yuuna. 3 Tyāawe'sha' i'cue'shtyi vyyu wala cutyil'j wēerra quijrráava išhiina caapiya'jatyna. Nava tyāawe'sh vituwal'j en pa'jana. Tyāa ente' iyumeetyna. Tyā'wē ewmeete pa'jwa'tjerráa yā'j nviitni ūsta' nyaffi.

4 Dyusa' tyajy angeleswe'sh yujtyva peltunaime' ewmée yūusa yā'tyji's. Tyāasaíic infierno iiméj seena' wala chji'ndyte nvijtina ūsu' castigāywal'j

en äjtewe'sh. ⁵Dyusa' nyaffi enteyva peltunaïme' nasa ewmeesawe'shtyi'. Tyãasaïc nasa ewmeesawe'shtyi iviituya' nus caajna ùsu'. Naasáa Dyus yuwe pta'shsa Noé yuurraánac nwe'we vite' tyajy yattewe'sh sietesa yã'jrra. ⁶Tyã'wëy Dyusa' Sodomá vite' Gomorra chjambtyi castigãyrra jyuca cjuutsrráa yuupcachcu iviitu. Tyã'wë yūunisa yu' maava nasa ewmeesa yuutyi' tyã'wërrarráa castigã'nja jīna pta'shñisac yu'. ⁷Nava Lot yu'sa' nwe'wec, tyãa pitstjē'ja' Dyus dyi'pte wala ew fi'nzesa yu'c, tyãasac iiméj wala ewméé fi'nzesaty uyrra', wala ñusna fi'nze'. ⁸Tyãa pitstjē'j ew fi'nzesa' seena' ewmeesawe'sh yacj ùsrra', tyãawe'sh ewméé we'weni's wëse'jna ewméé yūuna fi'nzeni'sva uyrra een isac tyajy ùuste wala ñusna fi'nze'. ⁹Tyã'wëc Cristo' nwe'we', tyãa yacj utyaarra tyutemée fi'nzesa ñuste fi'nzesatyi's, sa' ewméé yūuna fi'nzesatyi's castigãywa'j vitrrac nviitu' castigãywa'j en äjtewe'sh.

¹⁰Sa' Dyusa' tyã'wërrarráa castigãina ewméé yaacynirrá's nwëese'jrra canzh yūuna fi'nzesatyi's. Tyã'wë yūucajnī tyãawe'sha' Cristo jycaajni's weechna nwëese'jmée juuna'rráa yūusaata', sa' ūucjmeety wëeshu' ma'wësatyva jyuca. ¹¹Naapcachja' angeleswe'sha' tyãa wëeshusaate jytjaacue chjächja juuna'sata' naa yujva tyãa wëeshusaatyi's wëeshuna Dyus dyi'pte ewmeete nviitu'tsmeeta'.

¹²Tyã'wëteva tyãa nasa' tajcy na'wësarráata' ew eena' yaacywa'j yu'sa' ji'pjmeeta', sa' ma'wësava uwerra icjcajn upysarráata'. Dyusa's atsewe'wepa'ga tajcy na'wërráa uutyna. ¹³Vitety pcyuupa'ga tyãawe'shva pcyuuni uutyna. Weech weechtyi yaaqui' naa quiwete ptsuwa'jsa yacjrráa ùsrrava. Sa' tyãawe'sha' i'cue'sh yacj ùsrra', i'cue'shtyi caytjame'jna yuwe susnaty fi'nze' i'cue'sh pcjaacjenite pa'jrra.

¹⁴Tyãawe'sh ùuste ewméé yajcymée yu' neeyū'tsmeeta' u'y pu'jycjēwrra'. Pcal yūuwa'ja's watyi'tsmeeta'. Peecy cacue's achamée chjächja pa'yacysatyi's tjēymeety pcalte cweete'je'. Vyua's iiméj wala ji'pju wëesarráata'. Tyãawe'sha' Dyus dyi'pte vituwa'jsata'. ¹⁵Ewsa's nvijtrra jypumbana ūsta', Beor nchi'c Balaan na'wëy yūusarráata'. Tyãa Balaana' ewméé yūurrac vyu's wala ji'pju wëe. ¹⁶Naa pa'ga tyajy al'jni jimba' nasa na'wëc juuna' we'we tyajy pcal yūu wëeni's. Tyã'wë yūurrac Balaan ewméé yaacyni's caanviitu'j.

¹⁷Tyãa nasa' pusu yu' ji'pjmeesa na'wësata', sa' tāapjnava ma'wëga wejya jyūna u'jue' tyã'wëysarráata'. Tyãawe'sha' infierno iiméj seena' wala ūucjūucj chji'ndyte ūswa'jsata'. ¹⁸Tyãawe'sha' selpiiwa'jmeesarrána wala iivejch we'we'ty, sa' tyãawe'sh cacue pcal yūu wëenirrá's nwëese'jni yacj vitety pcalte cweete'je'ty, jypumbana fi'nzenijū casejrra ūssatyva. ¹⁹Tyãawe'sha' quīj yujnava nwëese'jmée fi'nzewa'ja' jī'ty, nava tyãawe'shīi yuuva cytey yuumée ewméé pcal yu'sa' pejca yujty nwëese'jna fi'nze'. Tyãa pa'gatey nasa maava quīja's wejy yaaquina na' tyã'sna nwëese'jna selpisaarra tyã'wë yuuna. ²⁰Tyã'wë nwe'wesa Jesucristo's jiyurra naa

quiwete ewmée yūuna fi'nzenijū casejsarrava, qui' tyāatyirráa nwēese'lja' shawenduuna. Atsa' tyā'wē yūusa' nyaffi fi'nzenite jytjaacue ewmeetec wetena pa'ja'. ²¹Tyāawe'sha' isa caapiya'jni's jiyumeevatsne' wejy ew yu', tyā'wē Dyus jycaajni's jiyurra qui' tyuteena ūsya'mée. ²²Tyā'wē yūusaty we'werrac na'jī': Alcu' pungarrava, qui' shawendcu tyajy punganitey. Atsa' cuchi' ew aterrava, tyity cjūchtec pēw jī'c.

Cristo shawendna quīiwa'lj en

3 ¹Yacjtjē'ljwe'sh, naa carta' e'su fi'lnisa yā'ja'. Nava e'nz cartatey i'cue'shtyi yu'cypejna fi'jatstju, ew jypa'yacy ūscajn. ²Na'wē Dyus yuwe pta'shsawe'sh nyafiitey we'wety nasa ewmeesa pa'jwa'ja's, naapcachja' Jesus jycaajnisawe'sha' Jesucristo jycaajni's i'cue'shtyi caapiya'jty tyāaty pechcanamée ūscajn yu'cypejetstju.

³Na'wē yūuwa'ja's cjuē'y mpa'yajcywe. Nmej en yuutste', nasa casejetyna tyāawe'sh cacue pcal yūu wēenirrá's nwēese'ljrra Dyus jīi yu'sa' atsesa. ⁴Sa' na'jīna weechna paapēyityna: Cristo' shawendu'nja jīrra', ¿mteega yuu? Sa' naa quiwevatsva quīj yujva yu'ptjejnimee ūsa', nyaffi ma'wēne' pjeu'jni yuu tyā'wēesa ūsa' āchpcach jītyna. ⁵Tyāawe'sha' yaaqui'tsmeeta' na'wē yu'ptjejni yuuc tyā'sa'. Nyaffi entey Dyus jycaajnite pjeu'jni yuuty cielu, quiwe, vite' yu'. Atsa' e'su yu'ptjejrira yu'a's fiic nvijt quiwēnava tyā'wēy. ⁶Sa' vite ente' Dyusa' we'wena jycaajrra' nusa'scu caaj, atsa' quiwe tyāa entewe'sha' vituc yu'te. Tyā'snaty jiyumeerra yu'ptjejnime' jī'. ⁷Sa' āchj neeyūsáa ūsta' cielu vite' quiwe tyāaty' Dyusíic we'werra nvijt nasa ewmeesaty jyuca naa quiwete iviituwa'lj ente ipy naa quiwe's jyuca cambuna jīna.

⁸Yacjtjē'ljwe'sh, vite na'wēsa'sva mjyiuwe: Cristo yacja' teeche ensarráa ma'c yuu meerra' mil añusa ma'c yuu nava tyachsa yu' meea', tyāa na'wērrarráata'. ⁹Tyāa pa'gaty ma'fía' naa sūju': Cristo' shawendu'nja jīrrava iiméj wala tyach jytjēyuu'tsa' jīnaty we'we'. Nava Cristo' tyā'wē jytjēyuu'tsme'. Tyā' teechráa yujva vitumée ewmée yūuna fi'nzenijū dund shawendvatsa' sūjna ūytjasnarráa ūsa'.

¹⁰Tyāasa Cristo quīiwa'lj ena' ājrráa yuuna yajcymée ūsiyna, pesweeva ma'wēga cus yaacynimeete pa'ja' tyā'wēy. Naapcachja' cielu' jyuca suweetyna seena' susniite, atsa' quījquījva jyuca ipyte chjavyna ptsuutyna. Quiweva tyā'wēy chjaviina cytee quījrraj ūstyna tyāa jyuca.

¹¹Tyā'wē seena' jyuca ptsuwa'lja' tyāa pa'ga i'cue'sha' iiméj wala ew fi'nzewal' jil'pji'cue, Dyus yacj utyaarra bagachte yujva tyutemée. ¹²I'cue'sha' Dyus quīiwa'lj ena's wala pa'pchuna mūytjaswe. Tyā'wēme' tyāa ente' cielu' jyuca vitutyna ipyte, naapcachja' quījquījva jyuca yu'watyna ipy achate. ¹³Naapcachja' cue'sha' cielu' u'sesa quiweva u'sesa'stja'w ūytjasu', Dyusa' tyā'wēsa's ūsya' neeyūuc tyā'sna. Cyteea' quījva jyuca ewsarráa ūs yuuna.

¹⁴Tyāa pa'ga tyā'wē yūuwa'ja's ūytjasna ūsrra', wala jypa'yacy meswe, cyaj i'cue'sha' Dyus dyi'pte yuuwemeesa ew fi'nzesa yuune'cue tyāa ente'.
¹⁵Pechcananuwe na'wē cue'shtyi jype'jsa Cristo jytjēeyuutsa' nava tyāa yu' maava ewte neeyūuwa'ja's pacuecajn tyā'wē ūytjasna jytjēeyuutsa'. Cue'sh yacjtjē'j Pablova tyā'wēyrrāac we'wena fi'j Dyus caaūusutje'jni's. ¹⁶Tyajy fi'l'jni carta jyuca naatyirráac we'wena fi'j, nava maaí yu' wala tjēyta' jiyuwa'j, atsa' achamée Dyus yacj chjāchja fi'nzesa' jiyumeerraty tyāa jiyunimeesaty tyāawe'sh ūuste fiy yajcyrra yu'ptjeje', tyāasaty Dyus libru ma'snava yu'ptjeje', atsa' tyā'wē yu'ptjejnisaírrāa selpi'c tyāawe'sh vituwa'ja's.
¹⁷Tyāa pa'ga, yacjtjē'jwe'sh, wala mpa'yajcywe dyiicjēy pta'shni neeyūutsi'cue tyā'wēsaty, tyā'wē ewte yā'j fi'nzenijū tyuteerra ewmeesa īshiina caapiya'jnite weteya'mée, ¹⁸wejyva jweefírrāa cue'shtyi nwe'wesa Jesucristo's ew jiyurra peeygāawa'jrrāana ji'pjuya' mpa'pchuwe. Tyā'sa' bagachteva wechana nes yuuwa'jsatja'w.